

Sotscrit un protocol di colaborazion tra ARLeF e Isontina Ambiente

La durade e je trienâl, cul fin di promovi l'ûs de lenghe furlane intes ativitâts di comunicazion istituzionâl de aziende publiche dal Friûl orientâl

ARLeF (Agenzie Regionâl pe Lenghe Furlane) e **Isontina Ambiente srl**, la societât publiche che, cun 75 dipendents direts, e gjestis il cicli integrât dai refudums intai 25 comuns de provincie di Gurize (e in 3 de provincie di Triest) coinvolzint 170mil abitants, a àn sotscrit un **Protocol di intese** par inviâ une **gnove sinergie par promovi il plurilinguism e, in particolâr, l'ûs de lenghe furlane intal ambit des ativitâts di Isontina Ambiente.**

«Stant la impuartance che Isontina Ambiente e à inte aree de provincie di Gurize, tant che partecipade di Entes Publics e impegnade, di timp, intal coret tratament dai refudums e intal massimizâ la racuelte diferenziade – e aferme la assessore regionâl al Ambient e Energjie, **Sara Vito** - al è fundamentâl che un aspjet tant che chel dal plurilinguism, che al è presint inte nestre societât in tancj aspjets cuotidians, al vegni valorizât ancje inte comunicazion istituzionâl de aziende publiche dal Friûl orientâl traviers l'ûs de lenghe furlane. E lu sarà ancjemò di plui dal moment che, in curt, o fasarin buinis lis regulis pal sostegn regionâl aes Ecofiestis».

«O sin sodisfats di podê dâ il nestri contribût a chest interessant percors, tacât di Isontina Ambiente, che al favoris l'ûs de lenghe furlane intal ambit dal servizi public di gjestion ambientâl, coinvolzint in maniere direte il propri personâl e i siei miârs di utents – al zonte il president de ARLeF, **Lorenzo Fabbro** -. Cu lis azions previodudis di chest acuardi la Aziende, tant che concessionari di servizi public, e promoverà in maniere efficace i siei servizis garantint intal stes timp il rispiet dai dirits linguistics e rinfuarçant la “fidelizazion” dai siei utents, partant indevant un “model” virtuôs che si incuadre dal dut intal percors di politiche linguistiche definît de leç 29/07 e dal Plan Gjenerâl di Politiche linguistiche aprovât de Regjon».

«Intun teritori dulà che dialogâ in lenghis diviersis al fâs part de cuotidianitât – al sosten **Luciano Zanutto**, aministradôr unic di Isontina Ambiente -, une societât come la nestre che e jentre ogni dì a cjase di dutis lis fameis, e à il dovê morâl di cjalâ cun atenzion, dant il risalt massim, a ogni singule particolaritât dal propri bacin di riferiment destinant struments e modalitâts di confront che a facilitin simpri di plui il contat cu la proprie utence, no dome in osservance de normative in vore, ma soledut inte otiche di favorî la miôr condivizion de culture ambientâl».

La ARLeF, duncje, e da la proprie disponibilitât a supuartâ, coordinâ, validâ e certificâ lis azions di promozion dal ûs de lenghe furlane; a condividi i propri canâi di comunicazion par divulgâ cun efficienze i progjets condividûts; a furnî la consulente tecniche in materie di politiche linguistiche pe realizazion dai progjets e dai impegns previodûts; a prestâ il propri servizi di traduzion dai tescj e il propri supuart pe realizazion des iniziativis previodudis.

De bande sô, Isontina Ambiente si impegne a declinâ in lenghe furlane ducj i materiâi realizâts pe difusion des regulis e de culture de racuelte diferenziade; a fâ la version in lenghe furlane dal sît internet aziendâl; a tradusi in lenghe furlane IsApp, la aplicazion aziendâl par smartphone; a proponi aes scuclis dai comuns furlanofons interventi di formazion in lenghe furlane sul teme de valence de corete racuelte dai refudums; a organizâ, pal personâl dal front office, un cors di lenghe furlane e a fâ dutis lis segnaletichis ancje in lenghe furlane.

Udin, ai 22 di Març dal 2017

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<